

AKHBAR : BERITA HARIAN

MUKA SURAT : 6

RUANGAN : NASIONAL

## Henti sebar video pihak menyamar kakitangan kesihatan

**Shah Alam:** Orang ramai diminta berhenti menyebarkan video konon ada pihak menyamar kakitangan Kementerian Kesihatan (KKM) membuat pemeriksaan COVID-19 di kawasan Bukit Subang, di sini.

Dakwaan itu tidak benar kerana siasatan polis mendapati mereka adalah kakitangan sah kementerian yang menjalankan tugas.

Ketua Polis Daerah Shah Alam, Asisten Komisioner Baharudin Mat Taib, berkata pihaknya menerima laporan kelmarin mengenai isu ini.

"Polis menjalankan siasatan mendapati ia adalah salah faham antara pengadu dan pihak yang hadir di lokasi rumah pengadu, di mana nombor pendaftaran yang diviralkan adalah salah dan tidak tepat sehingga wujud kenderaan yang lain.

"Tiga orang individu yang diviralkan disahkan sebagai kakitangan KKM dan kenderaan itu adalah milik Kementerian Kesihatan Daerah Petaling.

"KKM sudah membuat laporan polis pada hari ini (semalam) mengesahkan kehadiran pegawai KKM di lokasi bagi pemantauan individu dalam siasatan (PUI) COVID-19 pada 14 Jun kira-kira jam 2 petang," katanya.

Mengulas insiden sama, Ketua Pengarah Kesihatan, Datuk Dr Noor Hisham Abdullah, berkata kementerian akan memperbaiki prosedur operasi standard (SOP) membabitkan lawatan warga kerja ke rumah bagi melakukan saringan kes COVID-19 antaranya dengan menghubungi pesakit dahulu sebelum mengunjungi mereka.

Katanya, kerjasama kedua-dua pihak perlu dilaksanakan dengan pesakit juga harus memainkan peranan dengan menghubungi Pejabat Kesihatan Daerah atau polis jika rasa curiga atau waspada dengan kunjungan bagi tujuan saringan atau rawatan.

Beliau berkata, bagi warga kerja KKM pula, mereka juga harus memakai uniform dan membawa kad kuasa seperti ditetapkan dalam peraturan pihak kementerian.

"Kalau ada ketidakpastian ataupun rasa sangsi boleh menghubungi Pejabat Kesihatan Daerah...tetapi sepatutnya kita kena menghubungi mereka untuk mendapatkan kepastian sama ada pasukan KKM ini dihantar ke rumah tertentu untuk kes PUI atau kes kuarantin di rumah," katanya.

## KKM tak buat ujian calitan di rumah

**Kuala Lumpur:** Kementerian Kesihatan (KKM) tidak pernah melakukan sebarang aktiviti ujian calitan atau 'swab test' dari rumah ke rumah, kecuali dalam kawasan Perintah Kawalan Pergerakan Diperketatkan (PKPD).

Sehubungan itu, Menteri Kanan (Keselamatan), Datuk Seri Ismail Sabri Yaakob, mengingatkan orang ramai tidak terpedaya dengan penipuan kumpulan tertentu yang menyamar sebagai petugas kesihatan mahu melakukan ujian itu di rumah mereka.

"KKM tidak melakukan ujian calitan dari rumah ke rumah, kecuali di kawasan PKPD yang diletakkan kawat duri.

"Selain kawasan PKPD, tiada tindakan daripada KKM pergi dari rumah ke rumah membuat

ujian calitan. Apa yang berlaku ini adalah kes penipuan.

"Saya ada bercakap dengan KKM dan hasil pemeriksaan dalam gambar yang tular ketika ini mendapati ia adalah nombor pendaftaran kereta Myvi," katanya pada sidang media semalam.

Beliau mengulas berhubung gambar dan dakwaan yang tular di media sosial, mengenai beberapa individu mendakwa sebagai petugas KKM, datang ke rumah untuk melakukan ujian calitan.

Ismail Sabri menegaskan, sesiapa yang berdepan dengan situasi berkenaan digesa melaporkan kepada polis dalam kadar segera kerana bimbang menjadi mangsa penipuan dan rompakan.

"Jika ada kes individu datang

ke rumah mengaku daripada KKM untuk apa sahaja tujuan, tolong lapor kepada polis dengan segera.

"Saya percaya KKM juga sudah membuat laporan polis berhubung perkara ini dan mereka akan mengambil tindakan segera.

"Saya harap kita semua berhati-hati dan jangan menjadi mangsa penipuan kepada segelintir pihak yang mengambil kesempatan sepanjang PKP ini," katanya.

Dalam perkembangan lain, katanya, pengusaha perniagaan dan pemilik premis digesa menggunakan alat pengimbas suhu badan yang disahkan dan mendapat kelulusan Kementerian Kesihatan.

Katanya, mereka tidak boleh mendapatkan bekalan itu seca-

ra sembarangan bagi mengelak ia tidak berfungsi sebaiknya sekali gus memberi bacaan yang salah.

"Kalau mereka sudah beli, mereka perlu perhatikan dari segi ketepatan bacaan suhu. Kalau ada masalah mereka perlu hantar baiki semula," katanya.

Katanya, polis tidak mempunyai keupayaan untuk melakukan semakan terhadap ketepatan bacaan alat berkenaan.

"Cuma pengusaha perniagaan itu sendiri mesti mengambil inisiatif memastikan ketepatan pengimbas suhu.

"Kalau pelanggan tak puas hati dan tak percaya (bacaan suhu badan yang diambil), boleh buat aduan kepada pasukan task force (PDRM) yang mungkin akan bawa hal ini kepada KKM," katanya.